

摘藻堂四庫全書薈要

集部

欽定四庫全書薈要卷一萬五千六百七十九

集部

誠齋集卷一百二

宋 楊萬里 撰

雜著

祭文

祭張魏公文

具官楊某謹以清酌之奠西望慟哭百拜致祭於近故  
大丞相少傅魏國公張先生之靈嗟乎殄瘁之悲天人

否同慟至極者孔明與公敵人骨驚中原欲平厦屋垂  
成而折其甕孰喪孔明非天而天孰喪我公天而非天  
胡為乎天天厭漢也胡謂非天天宋睠也宋睠則那而  
集其老天不其奪天不其保叔破旦斧叔毀孔日天而  
能保則握其舌公來再相國人曰賢公既再去左右乃  
懽謂公賢矣莫留其歸公不賢矣國人我欺招以萬口  
麾以一手一不勝萬其然其否彼退則憂公進則憂憂  
同而殊國家之謀正叔之學公則心之君實之德公則

身之因心以身因身以君正君以

關

仁相于兩朝暮年暮月日洗天澄淮安江謚暮月乃爾  
胡不百年公而百年公無地安公今安矣民則艱矣呼  
公不聞民則潛潛蹢蹢小子受知惟深道學之傳可護  
於心報公則無雨以清血俎以名誼斟以誠實羸然倚  
廬莫望喪車千里一觴公其吐諸

祭羅季呂文

惟靈疑而不穡渠而的不有鬱斯幹而不千尺不惟天

倫滴淚到泉凡我昏友誰其不潛子之尊公非異人望  
心子目子搏扶而上心久益堅目久而穿豈子不願然  
懸乎天天司下人培淑賈慝子慝則無而至此極春如  
其容淵如其衷蔚如其詞竟不其逢吾文則蕪聊復子  
慰子知不知涕則沸沸

祭劉公佐致政奉議文

疇昔之秋我往拜公公老不扶髮顏白紅秋又聿至則  
聞公病我首斯經莫或遑省云何不淑遽至於斯以哀

弔哀有國無之我不知公知公者天弟仕兄及德高於  
年子賢而文我友之冕義均孔懷豈特姻婭兩翁斯憂  
曰予兩家百世相繆其憂則私其意不私交不金石義  
斯磷緇公今千載言復奚益一觴觴公我淚沾臆

祭趙子顯直閣文

具位楊某謹東向慟哭百拜謹以清酌之奠致祭某官  
之靈歲在辛巳敵酋跳邊謂吾大江可投以鞭諸將干  
屯雲崩濤退天子自將與敵作對大江之濱有金其城

歸然孤堅敵不敢櫻匪城斯畏伊人斯忌其人為誰趙  
公刺史城以公崇江以公深餉以公豐敵以公擒公忠  
而勞民感以奮南國既寧公功誰問臺閣造天不以公  
登艷潏如象乃以公行蜀天遼遼公以喪返摧國之楨  
萬心一怨嗟我孤窮恩深惟公赴告來思悲填於胸職  
司其守莫哭於樞挹醴注茲詞以為侑

祭九叔知縣文

嗚呼惟我與公豈如他人族則小疏情則至親名則二

人寔則一身自幼至壯于學于仕我有公隨公無我棄  
公倡我和疇同疇異吾少也賤無廬於鄉流離之悲我  
豈無傷公曰子歸子去我恥他邦之人何得留子卜隣  
接屋此心疇知竹林之游老以為期別公三年此豈曰  
久如何公歸乃在於樞我忽無公如履失梁如駕失輶  
如涉失航天乎痛哉焉用呼天曰天與善公胡為然厥  
操栢竹厥德龜玉厥詩厥文凡今之獨天不祐公曷付  
之茲既曰付之曷不祐之西垣南臺皆公知己薦口方



開公則已矣我以官居會哭則那寓辭一哀公乎奈何  
尚饗

祭虞丞相文

具官某謹以清酌之奠西望再拜致祭於近故宣撫少  
保左丞相先生之靈嗚呼蠢彼逆亮肆于淮壖氣無長  
江不曰投鞭錡也既退權也亦潰孰宣王靈式遏狂悖  
公以書生雍容請行澹乎無營安乎無驚矢而石而公  
則身之有殞我躬無傷我師三軍一人萬人一心彼自

送死無勞我擒長蛇噬矣公其殪矣有吳圯矣公其起  
矣宗祐殆矣公其妥矣黔黎泯矣公其拯矣其後十年  
乃相吾君進退速遲盡詢國人人曰公來四方庶平公  
曰吾歸西鄙匪輕俾民知兵俾兵知畊雜渭之濱前無  
孔明大功垂成大星夜墮我師相泣彼則交賀公宅於  
揆人或公咎今皆公思公豈復有維彼之人於公曷畏  
曷存而忌曷亡而喜維此之人於公曷疑曷生而譏曷  
沒而思在昔聖賢疇免乎是苟無天日我心則愧維公

平生憂國如醒齋志下泉目其能瞑昔公在位如富范  
韓古風蕭蕭公欲追還率籲衆俊載飛載集而我何為  
亦寘百執我思其人玉立長身凜然目中御風駕雲思  
之彌近忽然彌遠西望岷峨有淚如綫嗚呼哀哉尚饗  
祭汪氏夫人文

嗚呼近世大家孰振厥華于江之涯惟王與汪于閩有  
光歸然相望有齊夫人維汪之孫王氏是嬪茂族相輝  
是似是宜孰盛于夷象服沃如壺彝穆如婦德肅如邦

君之來魚軒則偕鵲巢與儕云何不淑逝者其速隕霜  
于菽菲然醴饗不腆不豐小君之恭

汪氏夫人路祭文

夫人所怙肇自幕府扶日御天再考宋宇遂相光堯宅  
是元輔中興疇庸其孰與侶如夏女艾如周山甫如漢  
鄧禹如唐尚父盛德所流寔潤寔溥是生夫人典則有  
裕蘋蘩中清環珮中矩謂天不祐德豐厥付謂天不忒  
齡嗇厥與邦君方昌雲翔鳳翥諸郎玉立繼繼多譽偕

老之章陟此之句弗遂此詩誰謂荼苦江水沍只江月  
暮只靈載路只歆此醑只

祭羅元忠文

代內

嗚呼手足之親寔惟八人三兄五妹相依以生仲氏夙  
喪伯氏繼往維我季兄既老益壯嗟我夫婦宦游東西  
庚寅之別五年乃歸昨一見兄已有病顏今升兄堂兄  
聿蓋棺長松既仆小草何附蒼天蒼天有此惻楚翩翩  
者旌近彼幽宮一觴永訣悲不可終

祭三十五叔婆蕭氏文

於穆夫人憲部之孫大夫之婦保昌之嬪迺玉厥德閨  
中維則贊贊保昌俾劬厥職保昌倦飛棄官言歸二老  
其皤松雪相輝教子美孫芝秀蘭茁慶流如川有溢無  
竭保昌既逝夫人獨存如彼靈光巋然益尊云胡不淑  
媛草斯瘁美櫝斯殪象服斯閤嗟我先妣幼失外家鞠  
於夫人德豈有涯我見夫人妣如存焉歸而不見淚如  
迸泉尚饗

祭劉雱都先生夫人彭氏文

疇昔零陵師生同僚日親範模日聆英韶既而兩家復  
締姻好先人康強先生未老繫我老母相從夫人尊酒  
徵逐兩家如春歲在甲申我失所怙曠曠無依視師猶  
父先生繼往夫人白首兩家北堂二老眉壽如何不淑  
夫人隕傾赴告鼎來令人怛驚懿懿夫人淑問有耀班  
姑之文孟母之教毗我先生丕崇厥門命服有華丕顯  
厥身既貴且耄夫復奚恨家失賢母子孫之惜我將使

指詔遄其行弔之不得有慟失聲尚饗

祭張敬夫文

具官某謹以清酌之奠致祭於近故敬夫安撫左司之  
靈嗚呼孰航斯世不挾斯柅舍繫即濟孰玉厥躬不瑩  
厥蒙宵征不烽古我潛聖天實鐸之洌彼淵泉飲者酌  
之學外曰政人外曰天茲不曰欺天其厭旃孟聞諸伋  
程聞諸孟伋聞諸參參聞諸聖聖也析薪疇荷其重程  
也執柯寔胄其冢孰冢乎程紫巖先生紫巖有子紫巖



是似紫巖南軒胥為後先聖域有疆南軒拓之聖門有  
鑰南軒廓之聖田有秋南軒獲之我稼在圃其穀士女  
其饗有吳其烝皇祖云胡不淑上天雨霜嘉穀既零我  
心孔傷孰琢我璞孰斤我璽孰疾我藥九京不作豈我  
之私眚失母慈士失宗師邦失倚毗已乎南軒不耆其  
年不遐其騫天胡云然延顏之光揭孟之芒昭回彼蒼  
公未或亡歲在辛卯修門語離相從濠梁白首為期誰  
謂此別是日永訣淚盡眼枯續之以血嗚呼哀哉尚饗

祭葉夫人文

嗚呼結綠懸黎生於玉山火齊照乘出於龍淵世無賢  
母安得賢子山淵鬱蔥珠玉是侶於穆夫人禮儀閑閑  
圖史拳拳言德安安吉蠲蘋蘩肅肅雖佩環訓子其勤建  
家其艱式洪其源式崛其門象服脂田龍光便蕃中庭  
有蘭中堂有萱豈曰家慶衣冠之盛壽母之頌彤管之  
風變為蓼莪其誰弗恫某昔與賢子同科同舍東傾西  
應志無殊者升堂拜母此禮未陳生芻一束哭以斐文

尚饗

誠齋集卷一百二

欽定四庫全書薈要卷一萬五千六百八十

集部

誠齋集卷一百三

宋 楊萬里 撰

雜著

祭文

祭王丞相文

嗚呼昔歲云秋公在里居問焉以書荅焉劬愉今春云  
暮公在聖室唁焉以筆哀不能荅八月中澣我來自西

次於上饒聞公迎醫九月之九言至都下則聞公薨驚  
涕以雨爰自乾道壬辰仲冬刺經頌臺我初識公公為  
貳卿我則負丞葭玉六拙傾豁悃誠公自此升雲騫漢  
騰我自此退契濶一星我在郎署公宅元輔昔親今踈  
遐不媚附俗曩且嘻公驩不疑不寧不疑以此予知暨  
塵府掾夙宵幕辯狷有違從慙無舒捲俗侮且憎公和  
且平以水濟水曷曰作羹繫公秉心曠曠昭廓不渾不  
搖清水喬嶽孰無畎疆公坦以同孰無城府公開以通

孰不遑幅公抑以恭孰無色辭公粹以融近世數公豈  
無賢哲匪才之矜以量為悅公之在位或者公誹公既  
云亡疇不公思彼誹彼思公則不計公存公亡邦之殄  
瘁知舊眇然悼以其私人物眇然悼以其誰繫官於朝  
莫往弔之言寄一觴公尚醕之尚饗

祭衛大著母夫人文

傷哉夫人胡年之不長尚其家之昌其又奚傷粵自來  
嬪洵懿且仁相其良人學以發身瞻彼庭堦蘭玉其相

追琢成璋于晁董有光金馬承明遙雋握英匪我舉首  
疇冠著庭英又參卿夫也金陵皇皇使星子兮山陰雕  
軒互迎蕩節斯征兩地望塵有瑯佩聲盍百其年觀厥  
蜚騫隔座後先榮光相宣古凡有喪尚力以救矧友之  
疚若之何不弔伯鸞我寮阿戎我朋父子之間皆吾弟  
兄升堂之拜蹉跎至此生芻之奠必恭敬止尚饗

祭劉諤卿知縣文

嗚呼公之文足以追前修而口不置後進之片善面折

人過而退則稱其長當於古求今也則亡權輿一官百  
不一試改秩方新如斯其逝嗟乎痛哉與太尹爭是非  
寧使其上官面頸發赤以直一夫強死之命今尚有此  
決曹掾也耶以部使者之尊而欲薦公公則不屑其人  
而不願出其門謝其薦書而不受今尚有此不負丞也  
耶今求斯人姑置是事惓惓有懷懷我知己我始徒步  
摯文謁公辱公鑑裁拔之徒中謂彼珠璧寶不難得惟  
此人才可珍可惜始則教育使潰於成終焉永好重以



婚姻赴告忽來失聲有慟儀型堂堂吾不復夢民失慈  
母國失高賢士失主盟我失二天漬繇千里寓哀嘉旨  
公乎聞乎一訣永矣嗚呼哀哉尚饗

祭十三叔母文

某幼而無母壯而喪父老而哭繼母煢煢余生未即死  
者有叔父而猶父叔母而猶母也歲在己酉天奪我叔  
父今茲天又奪我叔母未死之身其將疇依天乎痛哉  
天乎冤哉恭惟叔母太孺人女德柔惠婦職孝敬母道

宣慈生膺恩封年享九齡子孫盈庭相傳詩禮復何憾  
焉誰云壽觴變為奠酒嗚呼哀哉尚饗

祭朱侍講文

嗚呼我未識公得之欽夫云今傑魁舍公則無我初識  
公玉山道間我病補外公徵入關平生相聞恨不相識  
既曰識只一見相得我欲從公臨水登山萬仞峰頭攜  
筇捫天揭取北斗酌海為酒染雲為裳剪霞為袖海波  
若乾更借銀河二老醉倒頓足浩歌天不誘哀室人癘

疾此意莫遂適反私室猝猝一見握手絕倒借曰不歎  
亦慰懷抱自此與公好如弟昆我齒兄公公賢我先邇  
來二老年各七秩告老之章彼此若一念欲命駕千里  
訪公尋盟玉山一快我悰有昊降割曾不憖遺奪國忠  
賢奪我友師赴告至止一慟欲死已乎元晦吾道已矣  
訣不公面哭不公聞生芻一束以瀝我肝嗚呼哀哉尚  
饗

又祭十三叔母文

嗟哉先妣叔母其妣嗟我繼妣叔母其弟二妣棄我我  
生煢然有叔母在如母存焉有昊降割又奪叔母疾哉  
余生何恃何怙豈無骨肉莫非後來母黨盡矣云胡不  
哀有餽其俎有列其醕一觴送歸云胡不舉自此永訣  
千年不晨仰瞻室堂有淚盈巾嗚呼哀哉尚饗

祭太師文忠公京左相文

嗚呼吾聞公名十年之先我守荆溪公察朝端我往一  
書公答拳拳我識公面十年之後偕掾公府我左公右

公使朔稅我出筠守自此一別不再盍簪十三年間一  
升一沉公冠台鼎我老山林公使稅時大節玉立公以  
哀往彼以娛接廷樂雷起花帽雲集日肝肉乾公辭秩  
筵以死自誓挽之不前全節來歸名重于山公歸自蜀  
逢國多故孝祖上賓聖考違豫手扶日轂安駕皇路襄  
我皇德天清日光妥我國勢鼎安岱昂諧我廷紳鳳雛  
鵷蹕如公忠賢與國永肩與川流禧與椿流年善人怙  
焉斯民仰旃秋氣將半望舒將團未團一縷公薨式遄

誰歟不仁隤我維垣維垣之位文忠之謚上恩疊雙不  
請而至他人敢承公則無愧嗟我與公同居江西分則  
鄉友情如孔懷我老乞骸公曠眊眉謂我之齒雖古所  
稀身猶康強毋遽曰歸三請乃白帝其允茲聞公反柩  
已達維梓我已老病不克唁只寓辭往奠有淚如水嗚  
呼哀哉尚饗

祭余丞相文

六七月間客來自南咄咄怪事有駭其談南斗之側文

星載昱一夕砰然貫於嶽麓南嶽之巔天柱一峰同日  
亦摧震於湘中匪峰則摧匪星則貫丞相余公薨於潭  
尹星精嶽靈既銷既零奪氓之母奪邦之英吾聞其語  
淚下如雨知音云亡流水誰御淳熙季年光宗潛淵公  
為宮詹我忝經筵慶元元祀皇上嗣位公為宅揆我以  
病廢公在華門如商甘盤如楚士為如漢綺園金得砥  
石木得繩墨鳳得羽翼諒我皇德公在宰廷楊綰之清  
君實之正子明之平補天不坼扶日不側支履不踣定

我王國帝睠方隆帝任方崇翩然去之歸雲冥鴻帝再  
起之保釐南紀惠然肯來周邦咸喜云何不淑我民不  
天天曷降割騎箕而仙鄉弔於朝士弔於野工弔於市  
農弔於社我本狂者深山野夫淳熙十二逢公中都公  
為侍郎我在郎署同省異曹一見殊故中都金陵一再  
為僚心則斷金情則同胞有酒呼我有詩和我一別雲  
散公升我墮公相我皇拔茹無方巖採結綠淵漉夜光  
恢彼雲網愁我長往搜林剔藪下逮草莽病夫掩局再



勤弓旌招之不來寘彼西清君恩天覆病夫非據微公  
之故胡為乎天路天乎至此吾道已矣東望一慟絕而  
復起嗚呼哀哉尚饗

祭趙民則提刑少監文

嗚呼淳熙季年天區丕平文傑武英鳳翽鸞停孝宗當  
寧顧瞻在廷孰為右賢孰為左親孰為宗盟帝省其名  
周諏九賓獨無為城天顏不怡爰詔邇臣麟趾之良各  
舉二人肅肅三公台斗宣精有鶚其表先生是親王言

如綸擢貳匠卿來儀筍班其人玉冰咸屬之目老成典

刑崇論川流名章霜清談者推表雙止德麟世無東坡  
孰價厥珍人為國賀公則我顰我武丹墀我心白雲月  
哦風呻猿崖鷺汀帝留不能出節湘衡薦獻庶獄於彼  
甌閩琚瑀珎璜大鏘厥鳴陶謝焚秘甫白收聲竟解其  
組歸卧柴荆鳳山其嶸錦江其崢潁濱之神山谷之靈  
於胥斯朋於胥斯賡劍池之藁丹井之醺我以吾醒一  
世仰止鴻飛冥冥既五其福盍千其齡有北者風吹彼

盡心孟夏之月辰乎何辰月昭其弦奄奠兩楹大人小子  
子沍若涕零高安晤離倏逾一星誰謂此別契濶死生  
走也耄矣維疾之嬰油幕遠而罔克駿奔有漬其繇有  
鯨其魴有慙其恫先生是聽嗚呼哀哉尚饗

祭西和州太守陳師宋文

嗚呼淳熙之季我守高安小邦槁乾遠民勤艱慨莫助  
之同流上恩郭內之邑有宰則賢辨訟也恕治賦也寬  
民氣穆如民譽藹然昔也及僚末期其年我名君滿君

後我先復會中都義均弟昆屢以治行升聞于天言輕  
乎羽推之不前竟老於外不登不騫君歸自西屢書相  
溫屬聞先驅於征塞垣再竹其符再朱其輜如何不淑  
一夕九原總章杞梓腐于尺椽太宮玉璫委諸瓦盆才  
難豈然用之惟難吾欲往弔弗克駿奔有生者芻有漬  
者縣式寫我哀式招君魂嗟嗟師宋英爽若存嗚呼哀  
哉尚饗

再祭余處恭左相文

嗚呼瞻彼日月如環斯循倏然而夜倏然而晨曾是人  
斯乘此大化忽然而晨倏然而夜晨夜之間又有縮贏  
回縮而折跖贏而伸有偉郇公金玉在躬潛天之學格  
天之功我學淵閔我功夔尹而不百年止乎耳順唐盛  
開元寔相韓休十月而去莫之與留宋隆康定杜公寔  
相五月而去王室用壯倬彼慶元左輔惟公期年而去  
皇基用崇三君子者進退雅雅奚以久為期月可也不  
久且然况歷其年使克永弼作虞孚先昔歲公薨反柩

宅里病不克弔遣倩塗祭今以塋期兒曹未歸病不克  
送老涕其漚一以詩悼兩以此誄箕尾之先三燭于位  
嗚呼哀哉尚饗

祭王謙仲樞使文

嗚呼淳熙作噩我守荆溪公職壁水一見異知厥後八  
載公為小宰我入郎署刮目相待自此投分以漆傅膠  
顧我奚取辱公定交歲在泥灘我以慙出公尹豫章館  
我勤卹來歲之冬我長道還公持釣樞再見解顏我既

孑立公亦孤峙寒栖獨巢胥存胥慰其後一年我使江  
東公歸淮壘尊酒再同夜闌秉燭追驩不足一揖而別  
日月轉轂誰謂此別遂千其秋忽聞公薨我淚滂流孝  
宗季年丕乂八極遠侔貞觀近踵慶厯儀儀衆賢金海  
玉淵孰為之宗未或公先有諤其議有毅其色伯夷之  
清史魚之直作帝耳目作帝股肱上所深知下所深憎  
帝有合宮公其梁棟帝有靈囿公其麟鳳晚卧霞外風  
哦月嘻手折若木濯纓咸池身潛名起人望靡已盍歸

乎來襄我明世赴告驛聞善人失聲玉折蘭摧嵩隕岱  
傾嗟我老矣沈痼垂死云何不天又哭知己千里命駕  
已負此期一束生芻弗躬致之滴淚漬墨以寫哀些一  
介行李贄諸靈座嗚呼哀哉尚饗

祭益國周夫人王氏文

嗚呼昔謝文靖方在東山其儷居之能無歎然昔向文  
簡方受書贊其儷居之載績晏晏賢聖通塞局關其身  
閨門戚忻則難其人卓哉益公萬邦是式懿哉夫人婦



道維則公之未相夫人敬之案過其眉匪直與齊公之  
既相夫人安之匪直載績澹如平時有魚其軒有象其  
服其在朝廟如在巖谷退歸午橋有漁有樵其在巖谷  
如在廟朝匪疾匪疾匪哽匪噎儵然而往如蛻如脫年  
七其秩不曰不齡國崇其名不曰不榮有斐君子而不  
偕老有遠過庭自公所召心乎不羸神乎不瞋此外奚  
憾神乎上征乘彼白雲跂彼織女臨睨人寰積蘇塊土  
嗚呼尚饗

祭周益公丞相文

維皇宋嘉泰四年歲次甲子十月庚寅朔越十一日庚子具位楊某謹以清酌之奠致祭於近故致政少傅大觀文左丞相國公之靈嗚呼六七月間聞公屬疾欲往問安我疾方棘曾未幾何聞公有瘳尚攜鴻文以應人求云乎一夕而遽不起嗟此哲人騎彼箕尾乾折天柱坤隕岱嵩國虧肱股道喪師宗天乎痛哉一老不慙自家俎邦聞者涕隕公自紹興奮繇諸生獨提一筆萬人

莫櫻遂收雙科遂入三館遂掌絲綸遂首輔贊中興以  
還孰冠詞臣維汪龍溪學士曰真公出其後而出其上  
發帝之令有一無兩高皇倦勤遜於孝宗託子者誰維  
陳魯公孝遜於光疇續陳者公扶日谷以照天下昔漢  
董賈玉映文事彼豈不文文而不位有唐房杜星垂相  
勲彼豈不位位而不文維文維位公俱其尤其詞典謨  
其勲伊周齡甫七十健若霜鵲而掛其冠而還其笏歸  
於午橋爭席漁樵岫遨川嬉風哦月謠酒船淋漓詩陣

跌宕九老非高七賢未放赤松之游公其前而皤溪之  
耄公其肩而汾陽之社公其全而神清之蛻公其仙而  
公一無憾我心孔悲殄瘁之傷其我之私嗚呼哀哉尚  
饗

誠齋集卷一百三

欽定四庫全書薈要卷一萬五千六百八十一

集部

誠齋集卷一百四

宋 楊萬里 撰

雜著

文

南溪上梁文

兒郎偉伯起三鱸之堂所傳清白子雲一區之宅焉用  
高明猿鶴懽迎溪山造請可緩歸歟之計攸寧老矣之

身南溪老人少出里中而倦游晚緣兒輩之漫仕江湖  
千里萍梗半生雖樂土之豈無眷故鄉而亦愛悠悠歸  
夢久飛墮於枌榆了了眼中今真還夫衡泌翦茅一畝  
結屋數間車轍有長者之多竹洞無俗客之至春韭小  
摘濁醪細斟掃花逕以坐賓親聽松風以當鼓吹田父  
泥飲從月出以見留童子鴈門或日高而未起小隱之  
樂勿傳於人甫練日以拋梁聊占詞而伸頌

兒郎偉拋梁東玉筍千峰到坐中胸次更無一丘壑其

如明月與清風

兒郎偉拋梁西坐待天邊掛玉筍羣稚還生桂枝想讀  
書已擬上雲梯

兒郎偉拋梁南觸眼青羅繞碧簦夾巷已無奇艸木陶  
家五柳柳家柑

兒郎偉拋梁北夜寒斗柄垂簷側底須百屋堆孔兄只  
遣五車迎子墨

兒郎偉拋梁上老夫老矣心猶壯仰看天河瀉碧空便



欲挽將洗氛瘴

兒郎偉拋梁下今年幸有如雲稼浣花春社定何如與  
我鄰翁作秋社

伏願上梁之後氛祲掃蕩日月高明天開地闢河清海  
晏要令平世家及國以舉安不獨吾廬子又孫而寧處  
施參政信州府第上梁文

兒郎偉襟三江而帶五湖惟古上饒之地秀千岩而流  
萬壑不減晉人之談我卜我居是端是度同知參政相

公身居魏闕之下夢寄故園之春萬金家書苦無他語  
千里明月祇說思歸永惟我家世有陰德先太師挾經  
世之具身雖不逢今相公遇明主之知天豈無報胡不  
觀乾道壁間之計抑又聞崔氏枕中之書再激餘波六  
月得雨播在人口驗於今朝舍錦里而不歸是繡衣而  
行夜爰得勝地乃立相門玉水前陳滙一潭之清鏡靈  
山後倚列百疊之畫屏雖云近市而無喧凜有幽人之  
遠致倅圖首肯端策辰良屬當執扑之巡宜有拋梁之

頌

兒郎偉拋梁東春曉千花繡畫中正對玉山峰頂塏一枝椽筆仰書空

兒郎偉拋梁西秋晚樓臺夕照低聽取烏龜山客語去年洪水決新堤

兒郎偉拋梁南槐夏清陰染蔚藍景德諸峰高見寺大溪一水滙成潭

兒郎偉拋梁北朔雪入簾深一尺望中玉作萬屏風箇

是靈山人不識

兒郎偉拋梁上一拋正拂銀河浪乘槎耐可摘星辰騎  
鳳翩然徧崑閬

兒郎偉拋梁下今年萬頃觀多稼相公日日只思歸要  
與鄰公同作社

伏願上梁之後君親尊顯家室燕寧凡我後人愛平泉  
之竹石亦令來世敬綠莖之林園懽愉之詞咏歌不足

奉先縣謁先聖文

某至愚極陋亦使為邑夙夜祇懼未知所以免於敗績者聞之夫子曰子率以正孰敢不正某雖不敏請事斯語尚饗

謁先師克國公文

先師克然有蘊而澹然無作不惟天下歸仁萬世皆歸之某受邑於此視事之初敬有謁焉尚饗

謁先師鄒國公文

言聖師者必曰孔孟言亞聖者必曰顏孟某諸生也初

學為邑視事之三日而有謁于先師禮也尚饗

謁諸廟文

有謁於神者非謁神也謁福而已矣某以菲才受邑於此其或無潔於其躬無仁於其民神其殛之謁福則未敢也至於降以穰歲驅厥癘疫神於斯民獨無意乎尚饗

辭廟文

某至於是邦水旱之與逢錢穀之為問雖有撫字之心

竟於民未始云補也賴神之庇全安而罷敢不重拜

辭縣學文

某承乏於方六七十之邑亦半歲矣而鄉校鞠為茂艸  
今猶昔也聚糧興學耿耿此心不遂而去某之罪大矣  
尚鑒之哉

常州謁先聖文

某以諸生冒守此土視事之始敬有謁焉重惟非才何  
以免戾嘗聞之夫子曰道千乘之國敬事而信節用而

愛人使民以時某雖不敏請事斯語

謁廟文

某以愚陋而守於斯神以聰明正直祀於斯身之潔汚  
民之忻戚吏之職也吏之淑慝年之豐耗必有司之者  
神之職也某臨民事神夙宵祇懼惟神無寧庇吏之有  
罪寧庇民以有年視事之初不敢不告

焚黃祝文

某幼被先考艱勤之訓登名官簿十年而喪所天暨有



列於朝則有不淚之悲仰惟聖上再歎泰壇洊䟽自葉  
之澤黃告明賜以繫官周行今而後能涓日以告於幽  
宮蓋已晚矣某也不孝之罪何以自贖惟先考歆享之

焚黃祝文

某八歲而妣氏實棄之暨某壯而仕既又官於朝每嘗  
君之羹則淚落入杯永思至痛終天罔極念不可使妣  
氏之祀忽諸不敢殺身以從養於地下仰惟聖上再歎  
泰壇洊䟽自葉之澤黃告明賜以繫官周行今而後能

涓日以告於幽宮蓋已晚矣某也不孝之罪何以自贖  
惟妣氏歆享之

焚黃祝文

歲在丙申太史告景至聖天子端冕執玉親歛紫壇熙  
事告成澤及四海煥然寵命賁我先公陞於議郎服在  
朝著仰惟英爽歆此恩榮

焚黃祝文

歲在己亥聖天子大享合宮湛恩臣子以及其親先君

朝奉是膺今命某以游宦久稽王命今馬來歸乃得以  
綸告之副遂燔以告先塋惟先君歆此榮寵尚饗

回贈先祖焚黃承務郎文

粵若我家儒學經訓寔肇允於我祖惟我祖經明行修  
師授學者閎於丘園不顯其光德充澤厚詔我後人五  
世有列欲報之德其道亡繇萬里屬當進階亟請於朝  
願移榮於我祖皇上孝理哀其志而俞之湛恩告第追  
錫京秩敬燔贊書之副徹於幽宮惟我祖歆此丕顯休

命尚饗

先考焚黃進贈通議大夫

昔歲季秋聖天子大享於合宮孝熙休成錫福海宇我先考以潛德餘慶增秩一等惟通達大議是為法從之崇階告第贊書用焚其副惟先考歆享之尚饗

先通奉焚黃文

聖上迺者郊見上帝釐事休成湛恩厯洪暨厥幽顯惟我先公潛德不曜闇而日章追秩三品贊書告第敬燬

其副聞於後賢光靈優然歆此天寵尚饗

誠齋集卷一百四

謹案卷一百第四頁後四行昔宋人請南宮萬於  
陳原本宮訛長据左傳改

卷一百一第十頁前六行天子不聞名按韓集董  
生行名下有聲字

卷一百二第一頁後五行公來再相原本來訛未  
又公既再去原本再訛在据別本改

第六頁前五行如夏女艾原本女訛如据左傳改





總校官庶吉士臣張能照

校對官庶吉士臣陳崇本

謄錄監生臣衛子忠



欽定四庫全書薈要

集部

誠齋集卷二百

五十六

詳校官助教臣謝登雋



欽定四庫全書薈要卷一萬五千六百八十二

集部

誠齋集卷一百五

宋 楊萬里 撰

尺牘

答太守

某伏以即日凜秋益深恭惟判府秘書牙樞入竟川后  
靜波台候動止萬福某幽屏遠村不能密伺拂天之旆  
政爾欲俟開幕府之日駿奔賓階以修桑梓之敬乃勤

遣騎下教先之諗以淮陰乃肯臨噲之旨州民何敢蒙  
此禮於詞人岳牧之前既止其踰垣之避又塞其遮道  
之迎擇於二者則有一焉願領令前來肯謂之進有萬  
其幸抒謝不莊不勝主臣

答蔡帥定夫

某伏以書雲令節愛日舒長恭惟某官惠威傍流民咏  
天迪台候動止萬福某頃蒙札翰遠詒慶問至自郡中  
書司亦復以謝劄委之復命令尚未達何也黃司理東

叔來出手筆其人之於文辭可謂篤好者見贈四六亦  
極不俗知自詞林宗伯許來也刺口問詩殆欲捐軀于  
李杜壇前者小至之辰墊人遠跡不得望見詩書之帥  
奉上千歲之觴乃勤遣騎賜書勞苦分甘名酒洗醅開  
嘗對車馬故人作尹眼為青杜黃二詩敬賦之以九頓  
首謝焉濟翁辱厚贐今日官府赤立之餘此惠不啻矣  
蟹賦草荷擲示末繇再侍願言珍重即登兩地以福寰  
海

答新清遠軍王節推

某伏奉手筆敬審即日雪寒台候動止萬福餉牛狸數  
腴松寔膈膊又照之以畫燭今夕濁醪真有妙理矣珍  
感何極姑蘇牋百番毛穎三十輩聊伴空茵匪報也承  
許過我當今平頭奴子汛掃苔徑

答王提舉大著郎中

南強

某伏以惟雪應候恭惟某官登攬未幾風采已肅民咏  
天渠台候動止萬福某臥病空山焉依獨有之天得免

愁歎未占叅觀願言珍重即從上雍

某日者吉水陳簿專騎修敬嘗因之奏記乃尚未達恭  
承一人鼎來拜天落雲錦之書老病自廢之人親朋無  
一字誰復噓呵其寒冷訪問其死生者乃獨得此於天  
上之故人豈但加于今人數等古人恐亦未必多也某  
政坐沈緜不能造朝得免是行幸矣誤蒙恩除非所據  
焉方且控辭乃荷慶語竦仄草草占謝不恪仰惟全度  
某頓首再拜敬問慈闈雙親福壽兼隆台眷郎娘均慶

精紙寄贈政所匱也謹下拜珍感山間不敢請委竦息  
竦息某小懇家藏撫州公庫六經偶缺三傳之釋文敢  
乞願指小史以清江薄紙印補便中惠我至幸不必裁  
割也

答顧侔

某小疎登峰造極之談寸心尊仰如水赴壑也伏奉誨  
帖慰喜可言即辰雨寒恭惟貳郡政成行且入覲神介  
台候動止萬福珍餉玉酥山村那得此味便覺清風吹

我入水精宮也至感至感鷄羝四十隻敬復伴空函匪  
報也占謝不恪竦息竦息

答廣東憲趙山父

某伏以天意釀雪寒威政力恭惟某官玉節遠華風采  
一新民詠其賢天悲其正台候動止萬福慶門德星之  
聚尊尊幼幼受祉有衍伏自使輶照臨衡茅美載尊俎  
里巷改觀溪山輝媚故老咸曰自有此里以來不知幾  
年今公盛事未曾有也追送紫氣凝睇行塵至今了了



在人目中名部遐邈按行難徧然銛筭婁空棠蔭清靜  
足可養望以待聘且得以施學道愛人平反多德之手  
繫嶺海萬里之外置之于畿甸咫尺之前此任之不輕  
而重也昭昭矣顧天下憲司名為婁瘠而東廣又瘠之  
到骨者然檢之小肅則不漏守以克儉則不窘某平生  
用此十室之邑三家之市亦無不可為者聊供一莞前  
數日連拜所賜二書其一報舉金幹其一告以下車息  
肩之初皆自城中遞至欲襞紙一作歌奇之字致悃款

之謝而天下無鴈池中無鯉奈何再施未報而遣騎至  
止銀鈎玉唾照映繭紙訪問生死噓呵寒吟詞旨勗愉  
此意中人何可忘也餉連州金柑不識此十有四季矣  
薦先之外留飯陸家不忍獨嘗也披緜十缶聊伴空函  
匪報也金幹荷季諾更望終惠未占再侍願言珍重即  
看賜環遂登郎從

答提刑何正言

同叔

某伏以鵬盡春回天意欲雪恭惟某官建臺邦畿密邇

天日高厚叅衛台候動止萬福年家台眷安問踵至某  
向者初夏專走一介奏記仰蒙報教重以書籍法帖之  
貺山間苦無姑蘇之便未克嗣音仰蒙遣健步賜手書  
銀鈎玉唾如從天落某老病免歸自分終焉遭逢聖明  
特有收召實以沈痼不能造朝一再控辭得免行役此  
已幸矣恩除過優遜避弗俞真鍾鼓樂鷄衣冠被狙借  
令人不我哂亦顧影自哂耳此蓋年文平日議論之餘  
嘯嚙挽摩之力遂濟登茲敢忘所元重勤慶語若將誦

周南之滯喜樂克之用者特朽株何以當青黃也年丈  
登攬亦既半歲直聲勁節清德峻望宜在王所日聽尺  
一尚竊遲之月湖山莊自有白雲守護明月看管何必  
切切掛懷抱先泉石而後王室非所望于蕭傅蓋公倡  
和亦時有之每與其兄子中往往言句交至所謂如行  
山陰道中令人應接不暇老鈍窘矣何啻一歲而七奔  
命一笑伏蒙遠寄真酥八斤建茶百盞松實赤鯿各十  
斤公以為千里之鴻毛我但覺窘兒之暴富感激珍餉

山邨那得許也辱徵近詩輒往數首一覽而擲之幸甚  
隱顯殊途合并無期願言珍重即從上雍

賀周丞相年

某屬入城府得望見尚相末光且勤為穆生而設醴榮  
感兼之踏凍還家臟毒之疾大作下血數升蕭然憊且  
病矣抒謝臯緩此故之以三朝又新敬哦數語以賀焉  
清無底十尊建康糟蟹四瓶乃長新制酒醇料足非市  
脯及公帑所造者敬藉手再拜上千歲之壽仰惟裁幸

又答餽歲

某已專人奏記敬修履端之慶茲不重累恭承遣騎沐  
有賜書華之以瓊琚玉珮之偉詞重之以酒麪銀麋之  
珍餉坐令寒谷頓發春光推謝不莊感愧交集仰惟台  
察

與江東萬漕

元亨

某伏以元夕已過春寒正力恭惟都運龍圖右史中書  
舍人年丈玉節遠華冰漕整暇天棐忠賢台候動止萬

福某老病之蹟待盡山林雲惠霞映焉依知免出處殊  
勢合并無期願言金玉厥躬即從上雍遂執事樞以昌  
斯文以樹善類

某頃在江左年丈榮歸不得一見猶獲一再致書未幾  
某謝病免歸遂與世絕姓名不入脩門書問不致通貴  
有如平生至親至厚孰與年丈者亦復作疎其勢然耳  
年丈以山藏海蘊之學瓊琚玉珮之詞光風霽月之望  
妙齡孤秀漢廷無右立右螭兼西垣天下尚竊避之而

論事剴切抵觸當權脫然冥鴻之高翔嚇以腐鼠而不  
顧公論勃鬱久而後伸東漕未足為慶然直權臣之前  
謾誦太史之留滯亦良快善類不平之氣矣青氈復還  
不夙則莫

某惶恐有懼大兒長孺在中都時嘗令進拜年伯蒙一  
見偉視今官總司漕丘幸得超侍使采之末光已書一  
考前任有四考今有益公定叟王樞使三章最緊者職  
司合尖也天惠孤寒年丈來臨二緊之章併在門下東



坡與王定國書云吾兒即公兒也惟年文動心一引手  
焉不勝望恩願賜之切

答張判院提刑

某伏以天氣澄穆景物閒美恭惟某官玉節光華民咏  
平反天棐忠正台候動止萬福某吉蠲筆硯奏記行臺  
且謝先施仰惟財幸

某初吉之爰暄涼唯謹副墨之子問訊有申恭惟紫氣  
東來牙樯西泝屏翳弭節川后靜波願言致敬馮網式

戒羞服允答凝旒之眷即膺走節之召某不勝心禱

某恭審清選名勝平亭祥刑德星臨翼軫之虛輝騰南  
斗仙槎度雲漢之表福被西江威惠滂流動植奮豫恭  
惟懽慶某屬以老朽卧疴山林自幸餘生仰席雲天之  
覆燾獨嗟病骨莫瞻綉斧之光華仰惟台慈又燭固陋  
某恭以提刑判院人門俱高照映當代文行兼懿表偉  
名流立朝則班行聳瞻外庸則勲績焯著會逢初政旁  
招異人謂宜綴上林之鵷鷺從此為明堂之柱石平讞

江右豈無他人乃屈星軺再臨舊治百城之民歡呼歌  
舞於二天之下矣九州四海未屬饜也含香握蘭筆簪  
持橐某旦旦以祝某側聞今代人物絕俗之標如光風  
霽月瑞世之望如景星慶雲不門下而誰在也某也山  
林衰病之身跡弛自放之跡與蓬藿居與麋鹿游安得  
望使星之末光放霄漢之上哉欲通姓名竊自薄陋敢  
謂收人所棄遣騎賜書清風入懷垂露在手何如其榮  
光也敬九頓首以謝將命

某伏自壬子之秋以病自免歸自金陵已作終焉之計  
去夏誤蒙皇上記憶下詔收召一再控免幸免其行  
而恩除自天擢寘次對此蓋惟善引類分以餘光未敢  
抒謝先辱慶語愧感之極言之不足仰惟訾省

答湖州虞察院

壽老

某伏以蘭楔已過春事趨農恭惟判府直閣察院分陝  
保釐天棐忠正台候動止萬福某臥病空山庇焉知免  
未占叅侍願言金玉厥躬判白之徵持紫之擢不夙則

暮某伏自壬子之秋謝病西歸即反闕荆扉掃軌世路  
遂決終焉之計姓名不出州閭書問不至通貴有如門  
下同朝知己之舊詩社論文之契亦復作疎非意也勢  
也敢謂高誼絕風不遠千里特走一介天落雲錦霞發  
簡牘以訪問其死生噓呵其寒冷此事今無古或聞也  
新詩一編披讀未了恍如墮冰井起粟豎寒毛不足以  
諭清警甚荷台座經濟之學麗雅之文孤介之節曾未  
展矧兆之一二老功左馮抑末矣即從上雍遂當間社

老生擊壤於畊桑壠晦之間受賜多矣益日望之  
某竦息僭易再拜敬問台閔玉眷恭惟尊尊幼幼受祉  
山則有委不外頒賜髹器書籍攝衣一一降拜感謝情  
至骨矣近詩數首呈似穎濱詩云木瓜却用報瓊琚敬  
賦以聞焉

與總領張郎中

某竊以首夏清和恭惟某官拜命維新三神送喜台候  
動止萬福某敬脩竿牘以候前茅仰惟訾省

某頃在金陵屢嘗奏記伏自壬子之秋謝病免歸自此  
姓名不出閭里書問不至通貴有如明德之崇高知遇  
之篤厚亦復作踈其勢則然至於心慕用每望南雲則  
與北鴈俱往朔風並馳也某廬陵村居去城六七十里  
賸欲駿奔遮見山立玉色之光去冬一病垂死至今茶  
然神往形留獨切悵跂

某竊惟貌貅萬竈之烟不可以久虛木牛流馬之任不  
可以輕畀聖主南顧得人於梅花雪片之外先之以

召節申之以除書其差擢之意勤矣恭惟驩慶然泓淳  
演迤之學雄深雅健之文光明雋偉之才自應立春風  
玉笋之班此行入奏昇金掌持紫荷遂留王所也必矣  
某將特賀屢賀不一賀而止

某惶恐輒有迫切之懇大兒長孺頃官湖外得仰事節  
之下蒙被國士之知台旌之西復欲壁置俱往是時以  
宿諾鄭酒官之檄不得承命然榮耀至今也長孺前任  
四考今已得益公王樞使張定叟劉戶部京削四章仍



有職司獨少合尖之奏茲事重大幸逢先生長者總釀  
下車之初敢望特輟一京狀以成就之八月便可兩考  
成資此而通塞濟以今日否以今日望走在晉舍此何  
適脚色狀一封敬以申納仰惟財幸

答廣東唐憲

某竊以首夏清和恭惟提刑太中錫節蕃庶三神隕祉  
台候動止萬福某敬脩竿牘以拜重勤伏祈委照某月  
琯之問彞恭有前候司靜作載見副墨不審比辰台候

何如伏惟明所居百順是叢多祉攸介更冀勗志茵馮  
之宜變調鼎鉅之奉某不勝喜頌

某遠跡山林臥病田疇姓名不出閭里書問不至通貴  
影響昧昧與當世不相聞至於門下尺素之問亦復作  
疎然高山仰止之詩實勞厥心何時晤對釋此鬱陶臨  
風依歸之極

恭審聖主有詔使星躔方典領鍛圭稚璧之司存復  
平反園扉茂草之審克三易蕩節曾不崇朝恭惟懽慶

某敬哦短啟以為執事賀具陳別牋仰惟省覽

某恭以某官負蜚騰英茂之望蘊光明俊偉之才掉鞅  
革塗跬步雲漢適觀聖主屢逸之意可卜鋒車促召  
之期含香握蘭昇金度玉不夙則莫某自此當不一賀  
而足

與余丞相

某林下槁人自放荒山墊水之外靜與猿鶴同夢動與  
雲月同意人間萬事九廢其一暄涼何如之問其不至

廟堂而非簡山立玉色之標長在目而非疎身輕恩  
重此心炯炯即辰六月維夏南風之薰恭惟觀使大觀  
文左丞相脫屣鴻鈞畫繡綠墊辭帥藩之重寄首書殿  
之隆名御風珍簡尚文造化三神隕趾裏我大忠鈞候  
動止萬福相門玉眷釐成山則某初聞除書私竊自意  
拂天之旆萬一有不鄙夸翼軫之虛而降上台之末光  
以照臨之則落霞秋水之勝雨簾雲棟之華門下下客  
尚得挈舫艤欵齋閣參杖屨上下岩壑追逐雲月為公

賦之竟墮在日暮碧雲句中抱此悁悁何時心寫短啟  
申賀布之別紙敢祈鈞覽

答吉水李簿

名恕已

某咫尺劒池之涯惟是清文風飛廣譽川流若日接膝  
曾未得一聽登峰造極之談是之為恨拜辱墨妙有不  
待傾蓋而相與獨至者推謝不恪惟洞視焉

恭審戴巾乃車來贊巖邑仁聲義實先甲己孚伏惟懽  
慶某老病林棲不得與凍黎偃子一觀惠化泚筆快然

答黃幾先

其一昨治報爾後罕便坐疎風訊寸心孤住碧崖道人  
來袖出手筆欣然多多即辰秋高霜寒伏惟侍側怡愉  
神介尊候萬福母夫人壽寧無艾頃蒙約下訪極知之  
來未易辦已而果然知欲再宛轉小出以踐此盟至感  
而塗之士未逢所厚不敢輕也人事好乖古屢歎之碧  
崖詩句古雅信矣佳士書詞筆力師競已甚用枝葉占  
根柢定不凡耳安得一晤醜九河以洗渴心落筆獨增

耿耿願言進學進德即看己未冠澹墨之題

答周監丞

某老眼眇昏久無警世之新文以一洗之忽拜萬象之  
記清新雅興兼麗班左自韓柳而下無譏大手所臨小  
巫屏息當抒數語挂名經端洵思乾乾願小紓其期至  
幸

答新守冬

某伏以開府云初時臨小至恭惟某官茂對令節丕輯

純嘏恭惟懽慶某僵臥空山不獲躬綴衆賓之末行面  
致千歲之善頌敬哦短啟塵賀見之別牋仰惟台察

答贛州黃侍郎

某伏以小至即序化日初長恭惟某官作鎮帥藩惠化  
滂被三神錫羨台候動止萬福某臥痾山墅蒙被餘映  
未期待見願言盡珍重理即膺醴嘏之拜扶樹斯道  
某幽屏山間殆與世絕千騎東來初不聞知不得遮見  
一吐耿耿茲蒙遣騎墜以翰墨訪問死生誼崇崛古之



所罕不論斯今也感慰何數惟立朝大節霜嚴日烈危  
言鯁論家傳人誦進退徇道出處中清于吾道有光至  
于作藩未幾仁聲義實與贛江俱東甚賀

某自壬子之秋謝病而歸已作終焉之計近于六月之  
吉上章引年乞挂其冠而諸公持之久不下此正如垂  
死之人親戚環而守之不放其瞑愛之祇以苦之耳台  
座知我者必憐我輒推謝并及其私云

某悚息進越再拜敬問台閔王眷恭惟尊尊幼幼受祉

山則頒餉官壺半百既旨且多凍壁冷窓坐變春溫降  
拜珍感山村不敢請委仰乞台察

答王信臣

某老病日侵臂痛比劇親舊書問十不通一不然如吾  
信臣豈不懷者即辰臘盡春生恭惟里居綽裕台候動  
止萬福某自六月之吉上章告老而諸公持之不下如  
此政如將死之人骨肉扶掖不聽其絕愛之乃苦之爾  
向恙未減否然不勇決一拔疽根所謂得臣猶在憂未

歌也某平生狂直太上聖語云楊萬里直不中律豈  
於故人而獨諂桓溫語孫盛之子云此史遂行自是闕  
君門戶事一笑而恕之幸甚

答胡聖聞

某日蒙過我而東知行不間不敢苛留堂堂得一夕把  
燭縱談我猶以為加少也奉教欣慰即辰臘盡春回恭  
惟循陔聞禮神勞尊候動止萬福某老病日侵犬馬之  
齒今歲平頭七十矣復駕言今焉求自六月之吉上章

告老而天意未俞諸公遂未與將上寢而不報既未奉  
詔又難再剡所謂有似魚中鈎也正學懿文小緩蜚鳴  
豈久無逢者席文行之珍以虞其親亦未為無報也願  
言保重

與提舉王郎中

南強

某伏以即日寒盡春生恭惟提舉郎中契丈澄清一路  
天棊忠勞台候動止萬福某敬脩辭以問焉于將命仰  
惟財幸

某冷將死灰過者掉臂聞者掩耳天上故人高誼邁倫  
孤風絕世玉節行部眷焉顧之不以榮確而廢久要無  
論今人求之古人亦恐如鱗角也繼睹郵音竊知祇召  
歸補春風玉笋之班然猶小遲及瓜王觀尚詘于新制  
某今年犬馬之齒已平頭七十矣復駕言今焉求六月  
之吉上章告老而諸公持之不下亦不以俞報蓋已陰  
塞其再瀆也士生為名累有似魚中鉤今方悟退之此  
詩耳

某悚息再拜敬問庭闕致政中大國夫人壽康無恙某  
進越有懇妻姪分寧簿廸功郎羅瀛少有俊聲早而擢  
第廉勤厥職好修未已某已嘗面納爵里欲于新歲上  
半年職狀破白之舉已蒙矜允今專人拜賜敢望不侵  
為然諾不勝寒士如天之福

送鹿與周丞相

某惶恐小稟偶長孺送至雙麟顧山園偈反僮青生疎  
不足以畜之平園幽茂而寬通給使武健而精熟且聞

舊有鹿今增其二可以羣矣敬以獻諸原圃惟鈞慈不  
賜揮斥榮甚幸甚

答朱侍講

元晦

某再拜伏以春事欲半暖氣尚遲恭惟宮使侍講殿撰  
契丈高蹈事外天迪忠賢台候動止萬福某自去年六  
月上乞骸之章七閱月而不報偶大兒謁吏部因令面  
控誠懇於廟堂諸公間方與將上而天意殊未可遂降  
不允之詔乃諸公答書云未要勞攘出籠之鶴尚絆一

足又須小待也今東床過城中留台翰於劉丞許披讀  
大慰尊仰之懷乃知目疾尚未十全大抵書生繙故紙  
則其青在目弄柔翰則其青在手某老来得臂痛之疾  
每一發則視管城公為仇遂與契丈分此二青可病亦  
可笑也近見邸報果若所慮此醞釀久矣隄久必決其  
勢然也道眼學力豈待外人開釋者然景純葵書東漢  
以前無有也老先生豈亦微信其奇恠乎景純忠義以  
死大節固卓然也然豈不前知其故而逆善其先人之



寔安乎已既無驗於人何有某平生最不信此因閒及  
之一笑王深父貽書於歐公畢仲游淮記於坡老可試  
取而一閱否未見君子願言珍重

答嚴州知府曾郎中

致虛

某屬者小兒幼輿試吏部塗出左馮因之注記蒙篤密  
久要視之甚偉且勤走專一介行李移書累繭作山谷  
之字畫追端叔之發遣逃虛之人得此茫然二字不足  
名狀其喜也即辰傳燭散烟春入侯家恭惟民詠豈弟

天相循良台候動止萬福某老日益加病日益侵去年  
犬馬之齒平頭七十幸得託禮法以乞骸骨而廟堂寢  
不以聞者八閱月不免令大兒長孺面控諸公乃得將  
上誤蒙聖恩降詔不允而諸公答書告以不要勞攘  
又未敢趣迫恐或以為激或以為要也出籠之鶴尚絆  
一足私訴之鄉里故人當蒙見憐也嚴陵頃於淳熙甲  
午寓居兩月以幼女寄產截齊故也是曾仲本將為訟  
某以州無寓公可恥留某充員而先妣及家人子懷土

思歸不能從其請曾丈至今悵然也是時州訐甚裕今  
得來教屢空乃爾何歟幼輿過逢乃拜方兄歡伯之餽  
所謂割白鷺股食鸕鷀肉推謝併供一哂來教五幅非  
所以用之鄉人焉某若是此報所謂吾尤子期而又為  
之荷荷會弁渺無前期願言珍重即膺郎從之拜南史  
見寄字大紙佳甚便老眼至感至感台眷恭惟尊幼受  
祉山則

與新隆興府張尚書

定叟

某伏以即辰脩禋已過禁烟鼎來恭惟某官帥閫建牙  
川后靜波天相台候動止萬福恩閔台眷鈞慶今似機  
宜今何曹在侍旁否某老日益加病日益侵去歲犬馬  
之齒半頭七十上章乞骸諸公持之寢而不報者凡八  
閱月因大兒入京今控廟堂方與將上誤蒙聖恩降  
詔不允出籠之鶴尚絆一足契丈知我當憐我也契丈  
臥護北門身當十萬外庸既訖便應入東釣樞顧斜飛  
取勢復照臨秋水落霞之虛何也十州之幸則大矣天

下之福則未也然老病墊人遂得故人以為獨有之天  
此又幸之大者不敢以為門下賀私為病身賀也大兒  
長孺首蒙論薦又蒙推轂于耿漕遂獲改秩此恩已不  
貲矣臨行窮空又拜厚贍度越屬吏之常誠為創見不  
爾幾不能歸真東坡所謂我兒即公兒也感服恩紀言  
之萬此寧有足耶

某惶恐復有誠懇妻姪迪功郎分寧縣主簿瀛三世登  
科者七人此郎其一也能文曉事廉勤自將到官一考

名譽甚休頃者契丈帥臨安之日羅簿嘗得拜見仰蒙  
與進今幸得超事首縣之下敢望台慈特輟今年上半  
年職狀一章以收錄之過于某身受此恩也亦已懇南  
強提舉亦見與論薦矣僭易皇恐未占參侍願言珍重  
即間兩社以復其始

答晉州李大著

君亮

某伏以禊事已過禁烟鼎來恭惟某官介蕃承流期年  
報政民詠天迪台候動止萬福某臥病荒山乘化歸盡

西望故人渺無再會之期願言珍重即膺賜環遂正持  
橐以昌斯文

某伏自歸覽西沂小泊龍蟠虎踞之邦肯為老夫小留  
遂得秉燭把酒握手縱談追還道山之昨夢一別七年  
蜀月楚星各天一方每一矯首遐想故人此心翩然與  
大江長逆流而上忽焉歷瞿唐過滙瀕也今者剡有二  
騎剝啄柴扉手把一封書如天落雲錦謫仙此句端為  
我發再拜三讀豈但愈頭風刮眼膜而已泚筆摧謝未

究姦兆之一二云

某把翫書辭驚喜未既忽見赴告先丈朝議尊伯奄棄  
榮養既久外除欲弔則已緩不弔則已疏二罪當併按  
也若以地迴人遐為解則後之一罪又浮於前之二罪  
矣朋友道絕之誅不敢逃遁敬自歸於大司府之司敗  
伏紙楊若恭審浮膺茅土榮建牙纛以便鄉就國之寵  
有過家上冢之榮恭惟懽慶然有如契丈挾經世之具  
發揆庭之文政使小却猶應對紫薇秉金蓮也朝賜環



夕引道某也尚竊遲之

某一昨壬子之秋移病自免雖得章貢以沈縣竟不能  
之官自此柴門反闕僵臥環堵四年矣乙卯五月誤蒙  
上恩收召亦以疾免而除命自天誕寘次對塾人僥冒  
微故人齒牙之餘何以拜此未能推謝先辱慶問九頓  
首以復將命今已後矣

某僭易再拜敬問契家玉眷惟受祉山則諸郎進學日  
新恭承遠寄文繡四種便面十本降拜珍投有萬其感

私居無以為報建本誠齋八集凡三千五百餘首聊供  
擊轅拊缶之一莞需堂記某豈其人初不敢承又不敢  
辭牽課數語以塞嘉命悚仄悚仄

答周監丞

某病痾空山肉黃皮皺右臂痛楚怨于操觚左目眊昏  
難于細字親朋書問幾于絕矣無似之名小疎于几閣  
此故之以恭承誨帖墮自天半盥手而披玩九頓首而  
朗詠不覺蹶然而起負牆而立凜然始有生氣濯龍二

火字洞心駭目得未曾有仲將凌霄逸少瘞鶴何必減  
焉阿戎英妙膏顧兒曹蒙博約之誨厚矣南北二臺天  
香國色吞雲夢者八九顧老圃山藹何足進焉抒謝不  
莊皇恐皇恐

答錢判官

文季

某屬者桑梓之邦幸甚得一世名勝以冠賓贊山林野  
人庇焉以免庸非盛福上印王覲小泊錦帆不嫌山石  
之犖确墊徑之詰屈膏臨環堵左顧病夫剪春韭炊黃

梁以留上客不蒙推去而不嗅何榮如焉何感如焉倥  
傴別去莫審旌旆之所指恭承誨帖下逮乃知依劉表  
嚴武于西山南圃間落霞孤鶩寂莫久矣今逢耿介絕  
俗之標豈無半語以寵光之獨不我寄何也顯晦殊塗  
自此遠矣握手論文豈再作夢願言珍重即看館學之  
除以重我國家

答虞軍使直閣

知能

某茲承遣騎狎至貽書續其七字之律四言之贊璫掌

王瓚昭兆舒鼎衆多如雨應接不暇二篇酌謝不能任  
也不敢虛耳

誠齋集卷一百五

欽定四庫全書薈要卷一萬五千六百八十三

集部

誠齋集卷一百六

宋 楊萬里 撰

尺牘

答朱侍講

某伏以夏氣有叙已覺微暑恭惟侍講殿撰契丈里居  
燕喜天棐壽俊台侯動止萬福某昨因劉丞淮記多游  
辱手筆之寵甚慰尊仰之懷王君報書當為轉致台諭

云未可破戒我道蓋是也王君豈不解此語契丈既安  
受之而尚疑某之察否何也某行天下自謂知我者希  
知我者其惟亡友敬夫與契丈乎由今觀之知我者敬  
夫一人而已一笑東坡云過客如雲牢閉我口是在兵  
法拈出則贅矣某請老不獲又不敢促迫歐公所謂恐  
累教授以為輕發也士以進為難不知又有難者吉凶  
悔吝聽諸造物亦安能擾擾自苦也會合無期但深翹  
跂願言珍重以重斯文台眷尊幼均慶諸郎學士進學

日新兒輩蒙先生長者存問列拜謝臆有委候命之辱  
答撫州周通判

某頃辱車騎照臨山間此意殊不淺摘園蔬酌老瓦甯  
留片時予尤以為感恭惟某官對時仲夏天棐燕喜台  
候動止萬福恭審涓選今日佩服印章恭惟慶愜某臥  
病成嬾念念贊賀竟蒙先施賤詞清鏘字畫適妍襲藏  
為榮小啟修慶惟一過目而覆瓿幸甚願言珍重式佇  
判璋之徵某惶恐拜問親庭萬金之書恭惟繫道紹至



兒輩荷蒙問周悉次第長幼二子寄往提封當得脩敬  
中男百拜起居有里中妾願索聞之

與周丞相

某小疎奏記益勤報教是思青天白日長在上在左右  
也某比偶作一二閒文字王才臣云已誤徹鈞聽頗辱  
楓落吳江之問今錄二通呈似非敢享敝帚之估端欲  
求成風之介不勝主臣

慰程監簿

某伏以三春雨暘時若恭惟大孝監簿契丈孝誠動天  
三神感格孝履支持萬福某伏自壬子之春詔決讞死  
囚於上饒道休寧西郊仰蒙先文華學給事篤密事契  
丈承志承命遠出山驛衝泥班荆絕嘆誼風永懷意氣  
至今不忘惟是老病之餘是歲八月移疾還家人事都  
廢姓名不入於脩門書問不至於親舊深交厚契如我  
契丈亦復作疎非意也勢也至若出塵超俗之標登峰  
造極之談則夜夢晝思了了長在目中也茲以奉弔乃

得脩敬未占再晤願言俯就喪禮節抑哀痛以當門戶之重寄

某上饒之役初志以王事不敢一登宅里瞻拜先文華學給事謂歸途當遂此願既而憊于羊腸之險擘舟東下遺恨至今恭惟先丈高文大冊範模士流舊學耆英著蔡昭代謂宜百年如衛武千歲若廣成以重邦家亦聞上下岩壑步履如飛與客爭棋申旦不寐不知爾日何恙靡已遂至大故聞訃驚呼一慟欲絕嗟呼天乎世

豈復有斯人乎某以山居僻左聞之也後予之也緩負  
我知己言之怛怛且以老病不得駿奔會哭敬遣騎持  
奠章致不腆之儀寓一哀之痛伏惟財幸

某惶恐再拜敬問契家台眷惟哀苦同之今弟判縣朝  
議附此致慰有廬陵妻願細大聞之

答胡季亨宣教

某頓首再拜疇昔之歲車轍來臨初得識封胡絕俗之  
標東燭夜話不知落月滿屋梁鄰雞下五更也辱書深

慰別後一日萬周之思即日春寒未慙恭惟刺經畊筆  
此樂無央尊候萬福玉眷均慶某老病日侵自去年七  
月一日再上納祿之章而諸公寢不以聞又不敢迫趣  
恐動不如靜也姑聽之耳未見願言珍重以須晚成之  
寵

答本路趙不遷運使

某伏以即日首夏清和兩風時序恭惟都運直閣年丈  
英蕩又新神天送喜台候動止萬福某老病摧隤爰自

壬子八月移疾自免歸從金陵深閉荆扉長往丘壑不  
惟自棄於當時不必息交而絕游而世與我而相遺物  
與我而相忘姓名不入於脩門書問不至於通貴坐分  
黃犢之草眠占白鷗之沙而生平故人致身青雲背負  
霄漢者亦不復俯視蜩鳩激活波臣矣過者莫之孰何  
豈有天上使星芒寒色正乘斗柄之槎臨翼軫之分珥  
節曾不崇朝慨然興懷一念首及四海九州之同年閔  
其束散薪以煮白石攜長鏡以斲黃獨不遠數百里而

走一騎訪問死生使黃冠挂服之客手把一封書天落  
雲如錦所謂此事今無古或聞也仰惟年丈一世文儒  
之擇當今懿派之英乃與朝璽夜檠之寒士爭螢雪之  
苦以筆陣掃千人之軍持節把麾外庸有赫藉第令小  
謖德之鼎鉉亦何必減從善之簪索乎天其或者將以  
幸江右百城之凋瘵抑以幸短衣掩脰之一老視蔭未  
徙而日邊除書細作行矣曷日行部下詔舊治當與父  
老扶杖遮見道左抒謝不莊願言珍重

某惶恐進越再拜敬問年家玉姪恭惟尊尊幼幼受祉  
山則飫賜官壺雨露既旨且多復脩以玄纁綺縠有是  
四端此漢世諸公所以禮高賢者顧某不佞何以堪之  
降拜敬受冷窓凍壁頓作春溫矣感謝情至骨敬賦是  
詩以復將命者埜人不敢請太史馬走之役

某惶恐有懇賜書之初不應便引惹情謁仰恃年契愛  
厚敢爾不自外妻姪分寧主簿迪功郎羅瀛通經學古  
文詞俊發早忝科第吏事敏明已蒙定叟南強帥倉二



大舉以職令之章矣合尖之恩舍門下而誰望焉亦已  
計書兩考敢望台慈特輟今年上半年文字以成就之  
某實並受此薦也

答李子立知縣送問月臺詩石刻

某伏拜誨帖之辱又重之以墨刻之貺惡詩拈出已供  
觀者之一莞跋語儼非其倫恐誹有歸耳推謝不莊反  
仄反仄

答周丞相

某小疎奏記隆暑翕赫此故之以中男病心氣不能作  
春蚕食葉之聲需丐去冬丹鳳之赦恩以一紙終場年  
及四十許今詣曹受署叨冒安仁之監河皆異時化筆  
疏而為今之所波及也乍歸病暍未克走謝首勤墨妙  
勞還慶語周諄吾黨小子何以辱此于相國小涼當令  
扶服翹材大門之外以謝恩紀茲未究宣仰惟財幸雷  
君觸熱可念信如鈞諭

答晉州李知府

某伏以季夏之月南風之薰恭惟判府大著尊契丈報  
政有績祇召還京神天燕喜台候動止萬福某臥病山  
間乘化歸盡仰故人於青雲之上何從望見其末光願  
言盡珍重理遂膺紫微玉署之拜以昌斯文某屬披邸  
報恭審紫泥夜下號召正人青藜朝馳入覲玉座善類  
吐氣吾道用光恭惟驩慶某辱在草木臭味之同尤深  
松柏茂悅之感末由面賀而以尺紙伏惟財幸筆橐之  
除方且拭目以俟

某昔年拜入辱天落雲錦之書逮今緹衣千襲每弗除  
蛛塵手之而不釋也八千里外再蒙遣一介行李墜五  
紙妙帖訪問死生不以霄泥昇沉而兩其態不以老病  
汨振而白其眼厚祿故人書斷絕少陵之語可悔此事  
今無古或聞東坡之句獻也感謝至骨萬此寧有足  
耶

某目眩觀書手戰執筆平生止攜破研一拳亦久寄絕  
交書矣長者尚以故我來徵義槩之記拌擻病心倒懸

拈腸僅得數語以塞命戒謂應覆公家晉詠矣來教乃  
蒙稱不置誠不以榮亦祇以媿也二傳絕妙好辭右拍  
子長之肩左摩孟堅之壘陳范而下不論也珠玉在側  
覺我形穢矣老先生碣併荷寄似

某惶恐再拜敬問契家玉姝恭惟尊尊幼幼函祉山則  
老妻兒女列拜起居頌貺越羅絲坐下拜珍感蓬萊香  
十兩聊伴空函匪報也有廬陵妾願索聞之

別趙知府

某以隆暑故小疎奏記齋閣寸心尊德一飯以之即辰  
季夏之月南風之薰恭惟判府提舉大中戒裝解維川  
后靜波天渠台候動止萬福台閔玉眷尊尊幼幼受祉  
山則某臥病山墅殊不聞人間事一日二日似聞尊公  
致政大中小爽節宣之宜萬金之書既至台抱側側不  
遑寧處謁告棄印戴星駿奔言歸覲省

某癰老幽屏不振之蹟一見荷傾蓋遂得仰依祿賴于  
獨有之天者三年于茲父子廩餼始終知遇不以衆人

遇之老身義當撰屨疾走追送牙檣偶以病暍伏枕短  
氣如縷不能支梧敬遣大兒某遮拜道左惡詩一篇聊  
寫戀戀銷黯之情惟一覽而擲之地烈日翕赫遠途良  
勤願言為君親自愛即看詔追遂從上雍

答棗陽虞軍使

某伏以即日素秋有俶新涼入郊恭惟知能軍使中大  
恩契兄乘邊以整臥鼓滅烽民詠神介台候動止萬福  
某老病日侵乘化歸盡去秋再上乞骸之章迄今未報

亦姑聽之然自壬子至今時致事已七年矣第未結階  
耳鄉中去國西門數千里而遙不遇東西行者相思二  
字安得至我故人之側清風朗月未嘗不思玄度耳遣  
騎墜教四六千百之牋稠沓煩悉何其過勤也自代之  
舉聊以自見區區薦藻小小獻芹之意而已在故人則  
亦焉能為一羽焉能為千鈞哉

下問詩之利病知非肝鬲上之語敬陳所見寄大兒七  
字甚奇古如分公十四字渾成雅健使山谷見之猶應



擊節務官二句乃散文語前輩固有偶出此體者如木  
之就規矩然吾曹不可學也其餘或奧澀而不風騷不  
可不知妄言皇恐來教至宿草不哭之語令人淚落不  
能休山谷云惜無千人力負此萬乘器敬賦之詩以洩  
孤憤願言珍重即膺召除

答全州王通判

某伏以素秋有倣新入郊墟即日恭惟巖老府判太中  
契丈監貳政成為裝王覲神介台候動止萬福某老病

日侵乘化歸盡行且晤對豫以寔然願言羅閨必戒丈  
食有嚴用對越都官之拜

屬者文度來歸袖出旱蛟驚蛇之字久未督報而廝赤  
又以近誨為賜矣亟拜何覩如馬某茲蒙誤恩序進諫  
大夫之秩噓枯所逮抒謝之極慶語所臨祇重其不敏  
之辜耳陸沙文字仰感領略長牋妙絕禮則過之丁稿  
新詩酷似千巖昔點布陣似項羽見者惡之老夫之於  
此集亦云荷荷睹青邇止尚面傾倒台眷尊穉恭惟受

祉何數有委敢請千巖集三星圖荷寄似至感

與蔡定夫侍郎

某伏以素秋有倣新涼入郊恭惟宮使殿撰侍郎尊契  
丈殊庭高簡天棐忠貞台候動止萬福某老病日侵乘  
化歸盡南北相望侍君子渺無前期願金玉不貲之身  
復盟斯文棟幹吾國允答爾瞻

某一從亢旌之東介在山壑置驛斗絕表焉則不與大  
夫士往還裏焉則不能遣長鬚免尖蠟淨之敬曠不至

於几閣乃若山立玉色之標金鐘大鏞之韻無少選不  
在耳目中也契文學古居今持方入圜故應落落然啟  
沃之韞經綸之具持此將安歸造物不我舍是可終揜  
而不白乎日邊細作行之除書予日望之某昔歲七月  
再上乞骸之章迄今不報諸公之意則不薄矣出籠之  
鶴尚繫一足亦可憐生適候吏輦輅新二千石念此便  
不可失急呼兒覓紙敬問如何墨淡字傾與無書同又  
賢於無書耳

某惶恐再拜敬問契家台眷恭惟尊穉受祉山則膝上  
文度今何曹何地抑有在桃李之庭者否老妻女兒列  
拜起居有里中委囑所願勿它

答萬安趙師迴知縣

某伏以即日涼秋恭惟知縣中大學道愛人民咏天棐  
台候動止萬福某老病自免世我相遺誰者比數過聽  
誤矣特書先馬再拜循走不敢承也不敢信也推謝不  
莊伏惟財幸

某屬得侍郎彭丈吃吃談知縣文行之微懿以其言想  
其人定知不凡及辱墜言先之以言賤申之以雜著發  
書占之金玉相輝韶濩以間蓋吾宋乃有兩德麟西京  
不得一子政顧老朽知之晚矣范曄所謂子陽井底蛙  
者果若其言則元愷宜產於環堵旦壘不生於京室也  
願言自愛遠者大者老夫假須臾無死尚親見之

答余丞相

某伏以沆陽有叙清涼未多即日恭惟判府安撫大觀

文左丞相作鎮大維分陝一面德威所瞻北垂以安王  
室以安天棐大忠釣候動止萬福某老以耄及病復日  
侵縱浪大化之中應盡便盡獨東海之鼈左足尚繫未  
得恣意曳尾泥中耳去歲再上乞骸之章迄今不報諸  
公美意夫豈不厚然摧墮之鶴歌側之馬與其留之藥  
翫孰若縱之水宿愛之捫伏孰若放之林栖此外惟有  
注易一責長恐一旦溘先朝露使義文素王折券已責  
則此債無可庚之期今幸止有未濟一卦小涼當卒業

則冥然長辭亦勿之有悔焉耳矣它無足為知己道者  
昇潛異勢居侍無期不勝大願願愛重此不貲之身以  
畢未了之勲業以推轂吾君于五三以濟登吾宋於億  
萬年微我公天下誰望者

某墊人之居介在幽谷不假一卒于官以故無使令而  
平頭奴子生疎鄙墊人不熟於置鯉以故不能專介以  
致東閣之敬每東西行者偶與之逢便不可失則必寄  
牋秦記眷戀恩紀屢書不一書亦不記其幾回且不自



知其繁且瀆也丞相乃屈上宰之崇高遣一介之行李  
賜盈紙之真帖餽百壺之酒材有用之書策難致之蜀  
附至珍之蔗霜森然盈庭塞破茅屋少陵詩不云虛名  
每蒙卿相問汎愛不抹溝壑辱今茲訪問生死之誼膏  
潤豐碩之儀所謂惜不令德彝見之也感謝不足敬奉  
唐律三章八句別紙以聞焉仰惟丞相手扶黃道之日  
身柱大過之棟不動聲色不崇朝措天下於泰山之安  
車網未燠堂印未刊脫屣超然無一分顧籍心近世社

稷之臣於今無兩雖曰心如江水日向滄洲而后皇注  
想元老之意海內奠枕于京之望舍魯何適者惟丞相  
毋怠

某惶恐頓首再拜進越敬問恩闕大國夫人即日恭惟  
尊候萬福東閣郎君林下道蘊受祉山則老婦挺灾幾  
為臺駘所殺史巫紛若醫藥雜進幸而更生不謂上達  
鈞聽曲賜下問至感至感亦同兒女羅拜網馮之訊大  
兒自別奏記族弟濟翁炎正遂去作幕下士寵光赫奕

闔族榮曜黃倅竟辱列剡之恩此舉挈之潢汙轉之碧海無疑者莫簡二簿皆蒙恩顧之深厚愛其人者及屋上之烏某何以堪之小言詹詹何足以為萬分之一謝云酒材特荷赫蹠之諭至於印章款識之周密以防換易之敝克勤小物至於如許頃蜀士張季長少卿續寄似洮硯啟封則一柏笏也嘗以詩謝之云如何綠玉含風面化作青銅溜雨枝至今中都士大夫傳以為哂與鈞座慮事遠矣

與權府聶通判

某小疎奏記心往鈴下僭易有白事友人王子俊字才  
臣今日見過云剽聞台座因見益國近詩渠挂名其間  
辱亟稱而褒可者感激望表之知欲求一望見其末光  
大願不觸門牆之麾有萬其幸渠非敢有世俗可憎之  
求也併祈洞視焉渠於原夫輩之外詩文超絕云

與楊侍郎

某惶恐小稟一親戚岳之臨湘簿丁迪功南隱鄉里名

儒兄弟十人策第者二人其餘皆薦名而簿公以特奏  
得官文學深長吏能精密諸司多知之者見委之以攝  
峽之首幕而任守范憲以職令狀舉之然寒士寡合特  
未有合宰堵波之失者敢告宗文輟一令狀以辱收之  
一舉手之間使有出千仞壑之力并漂不食為我心惻  
舍門下宜無先焉者偶臂痛不能多番且懇勤於執事  
者惟燭照而星臨之有萬其幸

答曾知府

某伏以秋氣已末西爽彌高即日恭惟判府判院契丈  
政成王覲神天燕喜台候動止萬福某老病日侵前途  
就窄去歲七月再上乞骸之章諸公持之至今未下出  
籠之鶴尚絆一趾亦可憐生耳契丈中和平易之政穉  
耄歌舞之矣此行入奏小却猶當誕寘之含香握蘭之  
班但見其上不見其下也詒我金玉之音得得語雜情  
誼眷若不忍胥遠者使人懷抱作惡者久如也推謝不  
莊願言珍重即看日邊除書細作行矣

答朱侍講

某伏以肅霜既降即日恭惟宮使侍講殿撰契丈燕居  
蕭遠天相台候動止萬福某老病日侵祗有不如不見  
所超乞骸之請諸公竟不以聞寢而不報亦姑聽之恐  
以為只管煎燭也蒙似報教發於去冬得於今秋人事  
大抵然耳不猶愈於十書九不達乎昨日劉丞再遞至  
今年七夕一書乃知春間嘗小不快中間曾無疑亦相  
報云足疾良劇不知五臟神却不夢於子雲而乃苦之

以樂正子春之疾方寸不自跪其疲而下於者存楚昭  
王之所恥也一笑不問論著脫稿者幾千萬言曩者穉  
騃不曉事作此狡獪去冬因室家挺災為臺駘輩推墮  
井中欲打併徙居以避之怒移水中蟹凡此物輩多投  
畀鬱攸矣非徒逃天刑與鬼責而已契丈當愛我以德  
猶欲我欣然踐穿乎苦哉苦哉念書辭宜答又敢為弗  
聞也者而過之也契丈再歸五夫遂無車馬喧此某之  
所賀而來教乃謂苦於所居窮僻無書可借無人可問



疑義無與析信矣逃虛耐靜之難如此哉未見願言善保千金軀用奉荅當宁荒野之思

某僭易再拜敬問台嫺恭惟尊禪蒙福山則諸郎仕者  
居者為誰不及上狀老婦灾疚仰感存問非均骨肉何  
以拜此大兒尚待次一年有半中男調衡州安仁稅官  
小兒桂州戶曹皆待次長者來秋少者四年蒙問故及  
列拜起居有委不外

與福州安撫葉樞密

某伏以即辰維仲之冬清霜晴寒恭惟判府安撫大資  
樞使相公表海荒冬春仁秋威民咏共齊三神扶持鈞  
候動止萬福相門玉嫵受祉山則某身日益衰病日加  
侵祗有不如不見所起伏自去歲七月再上乞骸之章  
蒙鈞座與諸公間眷眷寵留未與上聞仰惟美意隆厚  
豈不永懷然滄江鷗鷺之墊性尚畢命而守階除也追  
惟向者來學省一時英俊並游於青霄而直上凌太虛  
而徑度遂持鈞樞宅三能者相公一人而已謂宜小俟

虛左之拜止一武之間崇朝之頃而翩然去之高則高  
矣君子曰胡不福我小人曰胡不穀我相公抑一念到  
此乎其皇恐至懇大兒長孺之妻兄承直郎澧州推官  
永嘉吳璫文世其家才敏於政其父公叔與某一再同  
官事契甚厚而某假守高安之日此郎為戶掾極賴其  
助首以京削薦之某再入道山遂令長孺娶其女弟異  
時此郎亦嘗參拜台座受知不淺今敢進越控告仰干  
一書殿京削端倚此增山嶽之重以求當路則此任改

秩沛然矣倘蒙特輟來年上半年之章以卵翼之所謂  
變化在咏苞也小官遣人即難得不虛其行生之成之  
之恩其輕重大小宜如何今帥閩雄盛非閩即蜀而山  
水之勝妙天下者必曰三山博約川巖月旦雲烟當有  
金聲玉振之句賜也可得而聞夫子之文章以否霄泥  
殊塗鵬鷗異翔安得致身於其側再聆登峰造極之談  
以豁此鬱陶滌此埃壒伏紙跂跂惟金玉厥躬以棟幹  
吾國而三五吾君再還廟堂永專國秉不勝大願

與鄭樞使

某伏以即辰維仲之冬清霜晴寒恭惟觀使大資樞使  
相公珍間冠倫沆瀣騎氣三神所護鈞候動止萬福相  
門玉眷受祉山則某伏自六七月之間長溪士人王應  
旂奏記帥閫受書謁之隸已徹聞否左席久虛天下日  
俟登庸而郵吏忽以得請祠庭報喜類及斯文非所望  
於鈞座也某惶恐至懇大兒長孺之妻兄承直郎澧州  
推官吳璫公叔監丞之子也文世厥家才敏於政自是

今日之人物某再假守高安此郎為戶掾甚得其助首  
以京削薦之未幾某再入道山遂令長孺娶其女弟公  
叔官南昌參幕時此郎嘗拜下風自此出入門牆深荷  
異知敢望鈞慈未忘其先契特輟己未上半年一書殿  
之京削以成就之諸司見此必爭收錄則改秩必濟矣  
公叔有知當為亢杜回以報不貲之恩也惟金玉是身  
即再還廟堂遂專國東以福斯世不勝大願

答周監丞冬

某伏以即日小至將臨清霜載肅恭惟致政提舉監丞  
尊契丈獨立萬物之表是叢三神之釐台候動止萬福  
某謹再拜奏記於受書謁之隸且謝委貺之腆仰惟財  
幸

某再拜敬問台閤玉眷恭惟尊尊幼幼受祉川增大兒  
進拜飲食教載之寵具能言忠誨煩悉之狀坡云我兒  
即公兒也今真得此於鄉先生矣有萬其感

答提舉雷郎中

某伏以小至將臨清霜晴寒即日恭惟提舉郎中契丈  
使節又新小憩錦里神介台候動止萬福某老日並侵

病日益加自去歲七月再上乞骸之章而諸公竟不下  
其事安得乞我一牧童林間聽橫笛乎易節使地得請  
可喜然猶小須未慰湘南父老扶杖之望何也然有私  
心獨喜蓋中男次公安仁監河之闕正在來秋正得趨  
事故人如天之福何以代此東坡與王定國書云我兒  
即公兒也某之於台座亦云好音鼎來訪問死生此古



人盛德之事多言何謝惟珍重以臨追詔

誠齋集卷一百六

謹案卷一百五第六頁前七行建茶百盞原本盞  
訛夸据別本改


第十三頁前七行聖主有詔使星躔按星下疑有  
脫字

卷一百六第一頁前七行里居燕喜原本喜訛趙  
据別本改

第四頁後八行英蕩又新原本蕩訛盪据周禮掌  
節改

第十三頁前四行范曄所謂子陽井底蛙者原本  
陽訛揚据後漢書改

第十三頁前八行沆陽有俶按漢書禮樂志西顓  
沆碭此陽字當作碭



總校官庶吉士臣張能照

校對官庶吉士臣陳崇本

謄錄監生臣宣祿光